

8N2-3-054

Ploumilliau (22)



Gwerz Koz

Zant Millio.

GWERZ KOZ

En enor da Zant Millio

ROUE BREIZ HA PAERON PARROUZ PLOUILLIO

Kanomp-ni holl, gant karante,
Eur werz bet savet a-neve
Evit enori Sant Millio,
Paeron a barrouz Plouillio.

Spered-Glan, ni 'deu d'ho pedi,
Ha c'houi ive, Gwerc'hez Vari,
Reit d'imp sklerijenn da ziskouez
Ar zantelez euz e vuez.

Sant Millio gan-imp enoret
En Breiz-Izel a oe ganet,
War-dro ar blavez seiz-kantved
Goude maro Zalver ar bed.

Sant Millio a oa ginidik
 A ouen uhel ha pinvidik ;
 E dad Budik a oa roue
 D'ar Vretoned en amzer-ze.

Budik en devoa daou vugel,
 En o bue gwall-dishenvel ;
 Millio santel, karantezuz,
 Rivod fallakr, kri ha lorc'huz.

Pa oa Millio erru en oad,
 E oe roue war-lerc'h e dad,
 Kouls abalamour d'e furnez,
 D'e skiant-vad ha d'e zantelez.

Kemer a eure da bried
 Eur verc'h zantel ha fur meurbed,
 Euz ar wrienn an uhela,
 Hanvet ar brinsez Aurilla.

Entre ma chomaz er bed-man
 An daou bried fur a-unan,
 Doue 'roaz d'è 'vid e c'hloar
 Eur bugel santel, sant Melar.

Tad ha mamm Melar a veve
 O-daou en karante Doue ;
 Bemde e kreskent en graso,
 En santelez, en vertuio.

Millio 'oe seiz vla war an tron,
 Leun a fe, izel a galon ;
 Dre e skouerio mad e touge
 An holl da heuilh lezenn Doue.

Evel galloud ar rouane
 A deu d'eze a-berz an Ne,
 Ren a eure ar Vretoned
 Gant karante ha lealded.

Kastian 're an torfejo,
Ha goprât ar mad-obero ;
Ober a re, gand damani,
Renta e wir da bep-ini.

Hen oa tad an emzivated,
Difennour an intanvezed ;
Ouz ar bevien 'oa truezuz
Dre ma 'z int mempro da Jezuz.

E garante oa aketuz
Da renta e bobl evuruz,
Hag an holl a veule Doue
Ma oa ken santel ar roue.

An noblanz hag an holl brinsed
Ouz Millio oa doujuz meurbed,
Karet e oa gand an holl bobl
Nemet gand ar judaz Rivod.

Rivod oa eun den gwall-ziuz,
Leun a lorc'h, ha gwariñsiuz ;
Poan a re d'ean 'n e galon
Gwelet sant Millio war an tron.

En gwirione, bevan a re
Hep fe hag hep doujanz-Doue ;
Noz ha de na huvree ken
'Met enoriou ha kurunen.

N'halle kaout ar rouantelez
Nemet dre wall-drubarderez,
O skuilhan, didrue, ar goad
Euz e vreur ken fur ha ken mad.

Piou-bennag a zo goneet
E galon gand an drouk-speret,
Na deu ket buhan da gilán
Rag ar pec'hed an euzusan.

Rivod, e galon peur-drec'het
Gand an diaoul hen doug d'e dorfed,
A bign d'ar gambr 'lec'h oa e vreur,
En zell d'hen lac'han war an eur.

Dre zindan ac'h a ar Judaz :
« Sed aman eun dra a bouez-vraz !
Deut, 'mean, me hen displego,
En eur vale ni a gomzo. »

Pa oant aet o-dapu a goste
E lec'h ne oa den nemet-ê,
Rivod neuze, gand e zabren,
A droc'h d'e vreur santel e benn.

Sethu penoz e oe lac'het
Millio gand e vreur milliget ;
Ar vertu a ve peurvuian
Gwall-gaset gand an dud fallan.

Pa oe klevet eur scurt kelou,
Ne oe dre-holl nemet kanvou ;
Braz ha bihan a oe rannet
O c'halono dre an torfet.

An eil a lavar d'egile :
Maro eo Millio hon roue,
Maro ar zant, maro hon zad,
D'imp-ni holl pebez kalonad !

Rivod na gavaz ket d'ean
'Oa trawarc'h gand an torfed-man,
Rag ar bec'herien kaledet,
'Lec'h paouez, a wasa bepred.

Kavout a reaz tud diroll
'Vid ober evit-an an tól ;
Int-hi a lazaz en Lammour
E niz paour, mab pennher e vreur.

Sant Millio hag e vab Melar
A zo o-daou' o ren er c'hloar ;
Ha Doue, dre o fedenno,
En deuz graet kalz a vurzudo.

An Istor ha Bue ar Zent
A verk hag a ro da intent
E oe Sant Millio sebeliet
En iliz-veur ar Yeodet.

Parousianiz a Blouillo,
Bezef deol da zant Millio :
C'houi eo e bobl muian karet,
Enoret-han hag hen meulet.

Pet sonj ez oc'h tud sant Millio,
Pet sonj e touget e hano,
Diwallet mad en nep doare,
Da zizenori an tad-ze !

Kanouenn Neve

EN ENOR DA ZANT MELAR

Mab Sant Millio ha Merzer evel e Dad

War don : *An tolennou.*

Otro Doue madelezuz,
A zalv ar bed dre dorn Jezuz,
C'houi a gurun ar verzerien
Gand ar skedusa kurunen.

Dreinded santel, oh ! ni ho ped,
Gret, evel gwech-all d'ar profed,
Gret d'hon c'halon en em domma,
Ha d'hon c'homzou en em dana.

Ni 'garfe meuli sant Melar
A zo breman savet er c'hloar,
A zo breman dreist ar stered,
Evuruz e ti an Dreinded.

Ganet 'kreiz ar binvidigez,
E-barz palez ar rouanez,
Enor, plijadur nag arc'hant
Ne oe treac'h d'eur galon ken glan.

E galon ken glan ha lili
D'an Nenv, yaouank, a re avi ;
Evel eur goulm e oa dinoaz,
Furoc'h bugel ne oe biskoaz.

An noblanz euz eun ine glan
Eo kaera noblanz a welan ;
Bleunien lugernuz ar furnez
C'houi dal mui eget aour, perlez.

Kaeran burzud a oe gwelet
Pa oe bet Melar mac'hagnet,
Gand eun dorn archant 'labouraz,
Gand eun troad arem e kerzaz.

Sklerder an Nenv 'deu da bara
En-dro da gorf ar merzer-ma,
E-pad mac'h a kuit e ine
Diwar ar bed, war-zu Doue.

War e bedenn, penn ar merzer,
A dorraz sec'hed e vuntrer :
Torret ive er c'halonou
Sec'hed diroll ar gwall-ziou.

Eur plac'h out-an 'n em erbedet
A viraz divlam he gwerc'hded,
Hag e oe skoet an den fall
Gand eun tol dibare rak-tal.

Eun devez, en eur dol eur men,
'Rejoc'h sevel eun eienen :
Melar, bet ive 'vid hon bro
Eur vammen euz an holl c'hraso.

IMPRIMATUR :

Brioci, die 1^{re} julii 1898

M. LE PROVOST, v. g.